



聖宋名賢五百家播芳大全文粹卷百二十
祝贊疏



祝皇帝聖壽疏

真乘演法常開最上之因寶藏繙文能起无邊之福
敢助虔於覺力庶增祉於皇圖 皇帝陛下伏願如
日之升如山之固永享諸天之廕長居八極之尊

祝皇帝聖壽疏

金仙建化啟第一之真乘玉偈演音集大千之妙利

切慕華封之祝虔依皇覺之文 皇帝伏願慧日普
臨禪天畢覆永固南山之壽長居北極之尊

祝皇帝聖壽疏

后作民之父母咸賴昌期臣視君如腹心敢忘報上
恭依慧力仍仰真詮僚魏闕以馳神効華封而申祝
伏願 皇帝陛下離明久照乾健常行益眷命於聖
神九州共貫永在躬之歷數萬壽无疆

祝太皇太后壽疏

玉相現前運能仁於普畛金文演義導真諦於羣迷
敢崇輯於妙因庶助緣於遐歷 太皇太后伏願如
慈雲之靡不覆如慧燭之靡不輝常居長樂之尊永
侈太任之德

祝太皇太后壽疏

寶覺現前示能仁之慧力金輪秘藏宣真諦之密音
恭憑最上之緣仰薦延鴻之筭 太皇太后伏願慈
如雲之永蔭福如地之无疆常居慈闈之尊日致聖

孫之養

祝皇太后壽疏

佛趣導迷慧力周於法界母儀正位陰教及於函生
虔依蓮畹之祠大啓海輪之藏庶崇勝果仰薦慈仁
皇太后伏願壽若靈山之高福如厚地之固常親
承於帝養永同祚於邦圖

祝皇后壽疏

演祇園之教悟夙智於本來繙貝葉之文資善音而

普覺虔依梵界祈右皇圖 皇后伏願北極齊尊諸

天密護流景光而配日崇厚德以儀坤

師相生日功德疏

元輔挺生應五百年之間世真皇調御懋一千歲之
昌期仰假道勲上崇鈞筭與山河而共固配箕翼以
長存庶使生靈永有依賴共惟大道證明

張徽猷生日功德疏

弧絢采顯逢申伯之生貝葉摛華不贊魯侯之壽

共惟 知府徽猷為仁由己以道得民名在西清本
公侯之閥閱政成南國皆傳家詩禮之典刑候
適素秋祥開黃髮王臣一節永扶有道之朝佛氏三
乘弥介無邊之福紺容易格丹悃難窮

楊殿前生日功德疏

洪爐老火陶上將之精神遙闕高真輔吉人之祿筭
式逢誕日恭集道流啓秘典於瑤函祝遐齡於金籙
恢恢至教能廣慶於人天業業高勲庶永齊於箕翼

代僧為丞相生日設齋功德疏

去麟閣之儀容既勤繪事演鷲峰之古義用集殊因
恭惟 某人道貫天人學超今古開物成務効已克
彰尊主庇民功无與二當泳游於覺海力衛護於正
乘惟大悲之道場實成都之福地向緣睠奏遂得賜
名 久以焚修親被恩澤絲綸降寵香火增輝是用
嚴金碧於層樓炳丹青於粉堵歸依寧替瞻仰无窮
伏願密契真詮普薰妙善躰胖心廣類廣成子之不

衰名遂功成似魯僖公之難老坐陪熙運永贊皇猷
張知省生日功德疏

金風玉露陶成物表之精神象軸琅函密贊人間之
壽考至誠所感純嘏是臻既殫肺腑於彤廷宜益年
齡於丹籍栢觴薦處映南極以增輝檀篆浮時拱北
辰而共永

漕使生辰功德疏

計敏夫

嵩嶽生賢以贊承平之運鷺峰闡教少伸集福之緣

共惟 某官學際天人志存君父榮方持於漕節慶
適值於門弘常此令辰屬城慶禱式憑貝典用祝椿
齡伏願密印嚴持普燈交照保形愈固類廣成子之
不衰作得長新如魯僖公之難老

太守生辰功德疏

崧岳儲休寔生賢佐鷺峰布教允佑吉人當誕月之
令辰哀屬城之歡禱皈依檀像演諷貝文伏願 某
官道氣愈新如蓮不染德容難老似栢長榮副睿聖

之乞言荷朝廷之圖舊

知縣生日功德疏

吉人為善通于神明皇天無親俾爾戩穀啟三島不
刊之典當一同難偶之期恭惟某官士氣昂霄仙
風絕俗非禮勿視日嚴北極之秘文以仁存心時舉
南邦之異政峻秩早聯於紫府佳辰適遇於青春爰
諷銀題仰千金闕運而無所積新事業於熙朝取之
不可窮永壽康於坦履丹誠懇禱碧落照臨

大碩人生日功德疏

與佛有緣生後如來之一日自天降祐身逢皇宋之
七朝既涉世途寧逃業障况以鶴髮耆頤之齒久居
鰲嶼瘴癘之區寢食難調指顧生疾於陰功之有助
殆人力之難支奚罄丹棕仰皈皇覺假慈悲之願力
作方便之法門滌罪垢於六塵災消雪霰壯福基於
甚善壽保椿松

功德疏

修聖祖殿成疏

天體蓋高神心莫測輒干洪造上布丹誠臣昔叩靈
祠恭陳祀事念棟楹之既久顧殿陛之未崇敢肆經
營精加興建造成峻宇仰奉晬容嚴寶構之清宮駐
霓旌之仙馭臣風依道廕不忘報稱之心永慕真銓
敢怠修崇之禮

興國寺佛殿畢工道場疏

王岐公

祇園之勝寶

御名

初成釋迦分身遍蒲空界蓮華啓藏

交誦諦文起一念之至緣導十方之迷識永依慈力
廣輯圓音

發願修水陸疏

東坡

苦海彌天佛爲彼岸業風鼓浪法是慈航諸佛子等
久墮三塗備嘗百苦不遇善友永無出期今者各於
佛前同發此願願除無始已來貪嗔惡業願發今日
已後清淨善心願行行坐坐歸依佛歸依法歸依僧
願世世生生遠離財遠離酒遠離色既獲生涼之樂

同躋極樂之方普冀有緣皆證無漏

簡州道俗齋萬僧疏

黃魯直

續如來末劫之壽莫大乎法供養乞上方香積之餘
不可以意分別崇成三德六味普飯十方衆僧貧女
一錢不以為少給孤側布不以為多知恩方解報恩
辨心即是辨供我輩生於五濁不過三災鑿井耕田
當知雨露之力仰父俯子實依桃李之陰年且屢豐
人有餘力興茲美報式契羣心伏願 皇帝陛下福

基堅固如不動妙高之山德澤汪洋等甚大功德之
海兩宮同壽箕翼衆星常拱太微河出九疇山呼萬
歲乃至麟符虎節千騎二車下為動植之春上協太
平之業凡我此會不勸而成若見若聞隨力隨分

觀音道場疏語

李仁甫

是觀非觀如水底月是音非音如谷中聲自一月二
月至無邊月觀之者當自己心雖妙聲梵聲及說法
聲聽之者不從他是故我今心田一念專精耳根諸

塵斷滅伏願觀世音菩薩廣上中下三乘之教化千
百億無量之身滌其罪垢罪自冰釋植以福田福如
川至副大覺明明之付囑蒲衆生種種之願文

設觀音供疏

劉中遠

身是道場心為佛土惟身安而道泰則心淨而佛來
伏念某幼而愚迷莫曉操修之懿晚復衰病尚懷顛
越之憂仰願慈悲俯垂護念俾延年而壽考庶進德
於暮途

設供疏

楞嚴會上雖已證於圓通菩薩戒中亦嘗開於懺悔
以衆生之宿業致諸佛之興慈謹指仁祠恭依梵律
伏願示大悲憫念多劫之塵勞放普光明度一切之
苦厄長在清夷之處遠離怖畏之災心貫十方罪無
實相業通三世懺有明文敬仰威容式修淨供伏願
慈航濟難法炬開明庶幾有相之身求除無妄之疾
一門皆吉諸福大來誓修進進之因期證圓通之果

祈福道場請長老升堂疏

竊聞昔妙應菩薩迺再世之辟支今長老禪師實後身之圓智傳心一印利物同符以無等慈悲設元盡誓願說無上法要度無邊衆生况某也持金剛誦般若破四相詣一乘雖見如來無上等根性疑與善現是一會中人妙諦儻聞道途頓免

看誦華嚴經疏

因緣契合得有此經慶幸平生孰如今日實身貧而

家富將口誦而心通誓盡此身敬恭不怠在在處處如佛之眷叔叔生生以今為始伏願諸佛所說如慶喜而常聞一生之間與善財而同證

懇普賢菩薩示現疏

王望之

峨眉異境普賢道場顯殊勝之妙光救昏迷之末俗凡茲瞻禮無間賢愚聖赴感以示慈人因相而生悟某等願心雖篤宿障未除逮此來遊起於一念初登山而雨作既升頂而煙迷險路八十四盤已驚破膽

白毫數百千丈未見示人恭惟普賢菩薩大士現如
幻身具大慈性掃重雲之陰冷階白石之光明使我
同來之人得畢此身之願誓茲以往永依上乘無任
虔懇之至

佛母孔雀菩薩疏

毒龍盡而釋迦出世乾坤還清泰之風未劫終而彌
勒下生日月垂貞明之象靜觀宿命弥切悲悰共惟
我佛母孔雀明王大菩薩薄伽梵身獨露三畝爍迦

羅眼普照十方凡屬含靈悉資覆育至使神明頓還
舊官雖捐軀命莫報鴻私恩等再生感深零涕驚峰
話別坐擎天上之春回象嶺言歸又是人間之夢覺

懺經疏

東坡

如來大藏起於四十二章過去妙心流出萬五千卷
前言具在後句分明縱有古佛六通難轉老婆一卷
念我夙昔見自本源悟萬善之同歸豈一法之敢捨
徧參重譯盡發秘函全見摩尼珠悉證貝多葉作此

大事示諸有情稽首雙林之輪不負二聖之唱

迎羅漢疏

寂滅為樂清淨自居見如來於四宏願中起神變于一刹那頃展坐具於一角地狹山摧浮柱杖於橫流紋歸浪改眉毛椶地指燄際天飼瑞鶴而一物等觀洒甘露而衆生蒙潤薰修精進虎為馳經諷誦勤渠桂專飄席或禮薄伽梵或入般湮盤呼吸而電掣風生噫欠而雲興霧合離諸着外指一鉢以何求住在

無為偏右肩而常袒支顧自逸隱几忘言靈山之鹿每啣花寶海之神獻瑞供針峰甚峻宴坐有餘芥子雖微納山不礙

放生疏

天地闢而聖人生中天麗日飛潛蘇而王澤洽寰海歸仁是資爾屬之性靈以祝吾君之眉壽或逢誕節爰舉彛章虫魚各遂其生廣唐虞好生之德葵藿皆傾所向贊箕翼有永之年

放生文

黃泰之

汝剛足以自衛智足以自晦而乃見獲於徒搏之夫
人喜汝以八珍吾憐汝以一死捐百金以市汝而復
納汝於清冷之居汝其益志於晦用保厥剛以速於
戾也夫

轉經藏疏

最上貝文甚深花藏具大法眼是真道樞惟運轉之
無窮寔歸依之有在圓機應物動化於一時善利循

環幸密於多福

福應廟乞加爵化緣疏

漢令有神舒民無斃將益隆於廟食用丕集於蠶金
翠琰龜趺秘十行之温詔寶韜玳軸來九命之真封
茲事不凡吾人何吝

設供禳災集福疏

蘇子瞻

躬儉節用本嚴房闈之風遺大投艱猥當廟社之寄
常恐德之弗類以召災於厥身敢即仁祠肆陳淨供

恭延梵釋普施人天俾壽而康非獨輔安于寡昧與
民同利固將燕及于華夷仰冀能仁由垂昭鑒

畫羅漢慶讚設齋祈保疏

某方釋大憂初起重疾恐殘年之不遂念未緒之未
傳惟阿羅漢之慈悲受釋迦文之付囑有求必應無
感不通爰有異人是名禪月畫此天日之表應於夢
寐之中若有物以護持俾凡生而瞻仰某誓同妻妾
歸依父師三世之業可消百生之寃自解仰憑至鑒

俯覺微忱危涕交垂占辭未盡

華嚴會禳災疏

陳履常

毘盧遮那徧一切處惟佛在名常寂光闡妙法於三
乘繹微言於九會圓融萬得頓超有作之思惟含吐
十方盡攝無邊之刹境以此發心則心地冥符於諸
佛以此修善則善願皆服於衆魔比者邊候繹駭民
屢震擾忠衛社稷誰傾漆室之憂力守封疆莫備形
門之役迺合諏於衆志俾同結於淨緣仰瞿曇清淨

之身起華藏莊嚴之觀吉蠲蕝藻眠滌壇場五體投
誠六時行道百千萬偈如聽普賢之宣揚五十三城
悉偏善財之游歷庶導迎於景貺一消弭於妖氛今
則法事既周善功斯立仰願寰區安乂再觀河洛之
清晷繹宣明共仰璿璣之正烽燧靡驚於幽障歌謠
載穆於康衢萬壽無邊一人有慶次願此方境內合
道場人咸罄悃誠各霑福利一曰壽一曰富惠我無
疆天生時地生財勤則不匱五風十雨而氣序悉臻

於調豫千倉萬箱而貲貯常保於豐盈物無害生家
有餘慶四恩三有法畛含情咸茂功德之林同泛福
聚之海

六祖塔下禳災疏

東坡

竄流嶺海前後七年契濶死生喪亡九口以前世罪
業應墮惡道故一生憂患常倍他人今茲北還粗有
生望伏願六祖普覺真空大鑒禪主示大慈愍出普
光明憐幼穉之何辜除其疾恙念餘年之無幾賜與

妄閑某敢不自求本心永離諸障期成道果以報佛
恩

遠任祈福設供疏

李知幾

荷國寬恩有周歲一萬里之徃復奉親遠役負全家
三十口之生成凜然性命之憂厚矣髮膚之記仰資
仙蔭聊課齋功伏願終惠長塗蚤瞻先壠温温江瘴
掃疫癘以潛消節節風灘戢波濤而無聳伏惟佛慈
證知

禱病道場疏

宋子京

聖覺流慈神華蒙護比緣椒極偶爽至和亟進七丹
未臻良已或慮晦明失展休王交期乘沴致愆直辰
為厄惟招禳之有典非妙湛而罔依已即堵波偏探
句偈延供十方之勝被除六疾之微指日有瘳介祥
無量益光惠命祇飭齋誠

祈嗣道場疏

史天秩

孫又生兒乃有移山之志老而無子難忘濟壑之憂

輒伸一念之誠仰叩九閻之邃某四世而下一子相傳積累之澤不流嗣續之微如縷顧惟仄陋實忝繼承雖憑祖考之休尚寡子孫之聚奉先思孝敬鬼尊神達旦炷香望高禩而致禱迎春剪綵詣聖母以投誠久傾葵藿之心未感熊羆之夢方炎帝執衡之候乃雙親設悅之辰按大藏之古儀建圓通之勝會庶憑佛力上達宸聰伏惟帝釋天主道濟洪纖得包用極生殖長養曲成而不遺主張維綱善救而无棄特

回昭鑒俯納虔誠一毫之片善可書三載之餘殃如掃策登九寸遇老嫗之授符環列四枚感黃衣之獻玉庶幾多子得以興宗誓勤陰德之修用答大鈞之賜

設羅漢供祈安疏

韓子蒼

菩薩應緣之號有長壽王聲聞利物之深唯阿羅漢肅依禪衆仰即真修伏願眷屬康寧子孫昌盛清淨少惱常居福德之鄉安樂延年重覩昇平之世

爲妻禱病懺經疏

韓子蒼

衆生困苦皆是宿因諸佛憫憐普加慈護惟華嚴之
妙典示法力之融通不可思議具如傳記伏念妻柳
氏本明養生無術嬰疾有年欲銷多劫之愆須仗一
乘之教願垂密祐早獲康寧使寒疾風虛悉離身而
遠去凡湯劑丸散咸應口以如神乃暨闔家並蒙百
福

祈嗣賽謝道場疏

神威不測蚤回從欲之仁佛力无边願效知恩之報
曩緣賤息亟恩賢侯曾日月之未淹俄熊羆之協吉
粲然蘭蔭既回宇戶之春籍甚貝文爰謹栢庭之薦
惟聰明之嚮譽庶壽祿以時升

謝登第設羅漢齋疏

史天秩

天道雖遠其聽甚卑神居無方有求必應輒具蘋蘩
之供仰申葵藿之心伏念某蹇賤孤生棲遲晚景此
緣鄉舉例試省闈愁入危湯懼脫奏名之籍夢還私

空忽瞻生世之顏致令失旦之窮獲預圖南之舉尋
思榮倖出自冥扶方仲春驚蟄之辰值真宰降生之
日勉陳清供遠迓仙風伏冀大士監觀列真垂睭掃
一生滯迹闢萬里前程仕路亨通壽年綿遠

還家賽謝設觀音齋疏

史天秩

某兄弟日者艱難遠役往返畏塗覆語盈朝大仇塞
路孤跡共知於不免危腸獨保於无他仰惟佛菩薩
之明俯察賢不肖之寔默然有禱恍若可通无罪以

書有枉遂直敢伸淨供少報殊私伏願某名宦有來
疾病良已公議盡出毀言不聞全家安乎山林餘蔭
均乎嬰孺悉除三世之業永忘一至之心敢冀大恩
俯垂至鑒

為子謝安設供疏

韓子蒼

衆生困苦之中但知呼佛諸聖慈悲之故常善救人
昨以二子同時一春卧病既不勝於憂悃輒叩於
真乘聃耳梵容嘗形夢寐楊枝法雨坐獲清凉敢具

伊蒲肅延飛錫伏願遵如來之誨飭作濁世之依歸
靡辭赴感之勞常昇闔家之福

為子謝安設供疏

韓子蒼

衆生願力無感不通古佛慈心遇緣皆應能令熱惱
盡變清涼頃以兒曹偶離疾厄不勝父子之愛仰叩
人天之師既獲痊安敢忘報謝伏願光明照了威德
護持壯老康寧孩童壽福仰惟妙覺俯鑒微誠

為女謝安道場疏

邵公濟

疾痛呼號於天煩惱根性自佛惟普陀大士之至聖
與閻浮衆生而有緣念弱女之疾甚危極常鑿之技
以拯默存善禱陰有感通夙按規儀敢忘報謝當更
務於修省莫益加於護持闔此哀門共臻殊祉

禳水疏

宋子京

比以積雨過常伏陰為沴失於潤下逮此橫流南屬
豫徐北綿河朔墊傷廬舍毀決防庸大田之稼其空
比屋之農胥歎雖天災代有或繫於機祥而寡德使

然敢忘於惕厲亟詢梵典祇結禳壇即秘宇之神深
集勝流而圖仰被除金界宣震潮音庶憑護世之慈
重濟薦瘥之困寢紆厄會回納大和促歸壑之有期
俾服田之就緒能仁普鑒大庇云依

禳水疏

趙莊叔

平原出水皆緣吏治之失中小民无知尚幸佛慈之
加閔敬修淨供演奉真乘惟潼涪千里之邦帶東南
二水之阻漲不時落地無子遺乃者暴雨連陰捍湍

四决惟鬼神虐用其罰起尋丈於斯須之間而民吏
不奠厥居寄性命於毫髮之上是用頓首皈命聲言
求哀願虔終夕之香燈全護一城之生齒仰惟觀音
大菩薩廣大不念罪慈悲不違人重雲歸山漲水返
壑吏民免魚鼈之食父老寬子孫之憂大德難名大
恩難報今者分飭屬吏各洗厥心非佛疇依既免向
隅之泣以民為急不忘在莒之危誓守丹衷仰酬法
力

水後禳謝疏

李樂靜

我聞開方便門施智慧力哀衆生如窮子假大願為
慈航比者暴潦淹旬川流漲野駭孤城而若塊憂庶
類其於魚惟是熙寧之間將罹昏墊之患威神一扣
瀦潦四空再瀝丹衷上千靈鑒惟願散白毫於頂上
盡逐頑陰吞巨浸於毛端坐成沃野永賴總持之賜
益堅回嚮之心

淨獄疏

陳無已

幽囿空虚實作太平之象法筵崇飾聿修典禮之常
惟此徐邦素稱鄗鄙獄无虛日市不絕刑解網施仁
奉 聖朝之初政治絲從理資賢守之良能迨此空
虛敢忘夫報伏願刑設弗用人自不寬熙熙如登春
臺濯濯鞠為秋草更憑梵力溥及含生

淨獄疏

蘇子瞻

民知榮辱自銷五福之疵政格平和遂絕一人之獄
今者國家閑暇囿空虚雖咸仰於帝仁亦陰資於

神聽是用集祗園衆大啓法筵蕩滌餘分拔升宿滯
此則妙音普贊勝果天圓振九泉冤枉之魂作萬古
清涼之地門生茂草氣實太和歲常獲於豐登民永
躋於仁壽

淨獄疏

陳履常

道興乎世民格于中不犯有司蓋習是知非而致此
必使無訟豈承流宣化以能然誰其尸之神所勞矣
肆嚴法席恭薦慈容刑清政平已荷能仁之賜日來

月徃益堅欲報之心

淨獄疏

朝廷尊道縣邑嚮風民有悛心但識耕桑之美庭无
留訟遂多扞獄之虛治雖責於承宣恩實歸於覆轉
敢修微禮上瀆層霄刑清政平已荷无為之化家給
人足更資不宰之功仰鴻造以難酬與羣生而共慶

祈禱疏

祈雨疏

李樂靜

稼事方興時澤不足既濫承流之責宜先闔境之憂
敢露精衷上千慈聖伏願法雲遍覆神力總持遽興
三日之霖少蘇千里之旱仰惟慧照俯徇哀祈
播茲多稼期於有秋雨澤愆期農夫失望儻陰功之
不與在人力以何能爰竭丹衷仰叨洪造尚憑願力
以惠嘉生

祈雨疏

祈雨疏

慧雲垂潤本無間於羣生旱氣為妖慮有傷於百穀
輒殫凡懇上叩佛仁仰冀慈悲俯怜枯槁甘露一洒
各蒙生長之恩豐年可期共樂和平之化

祈雨疏

林豈塵

如悛如焚正渴雲霓之望是穠是藁久罹旱暵之虞
祈求既竭於忱恟惠澤未蒙於霑足敢邀仙馭來慰
民情况山川有蓄泄之靈而田畝正徯蘇之望伏願
油然作沛然下遂成三日以為霖陰无伏陽無愆未

聞四月之不雨庶少寬於吏責使不失於農時

祈雨疏

龍雨而雩旱魃為虐原隰之田未偏播種井汲之泉
幾涸源流恐宣化之澤未盡周孚使致和之祥有至
乖戾輒輸誠悃仰禱慈悲伏願風淒淒雨祈祈不失
三時之務苗芄芄稷嶷嶷式寬千里之憂

祈雨疏

惟茲穡事長慙於夏弥月不雨農人告病惟神血食

此方與守土之吏同任其責如能大赫厥靈以澤羣
生不惟解民之憂寬吏之責亦可以彰神之休

祈雨疏

金風扇德品彙收功火日揚輝歷旬不雨澤既愆於
久望農功將壞於垂成俯竭丹衷仰叨洪造陰功嘿
相美利曲成濟用群生式貽靈貺

祈雨疏

神心莫測天鑒甚昭有感斯通善祈必報仰瀆蓋高

之聽輒傾小己之誠顧此疲民薦逢凶歲人方憔悴
帝亦哀矜當嘉穀之蔚興困常暘而欲槁稍愆雨候
將致年饑是用式謹明科恭趨真宇惟天威之洞照
察臣志之精求濟以豐年錫之甘澤仰冀曲成之賜
普霑善貸之恩

祈雨疏

慈悲救物立願宏深方便濟人運心廣大儻竭至誠
之懇必彰善應之功當時雨之屢愆念秋苗之將槁
驕陽未殄旱氣方隆是用恭款梵宮嚴修淨供伏願
慧雲遍施法雨普霑濟以豐年錫之甘澤仰冀无邊
之力俯成善貸之私

謝雨疏

李樂靜

廣願不違至神能速梵磬鏗而震雷作淨香散而蒸
雲興一夕霑濡千里膏沃輒伸精懇上報法慈誓堅
回嚮之心永賴函蒙之福

謝雨疏

雨暘失節民吏其憂方卜有祈先期是應精神所格
在菲德以何堪動植皆蘇惟大恩之莫報輒將卑懇
以謝无私

謝雨疏

以雨為命南畝之民膏澤不時歲事何望將率僚屬
有請于神密意潛通願答如響咸生皆遂厥功茂焉
祇奠祠庭以謝靈貺

謝雨疏

文士穎

時丁旱暵方增耗斁之虞佛示慈悲曲應精誠之感
膏澤一沛槁苗再生民有望於豐登國何憂於儲蓄
恩波廣被法力難思益推利濟之仁永息蘊隆之害
祈晴疏

天作淫雨將中敗於西成民有肅心敢上千於北極
念扞邊之師既力苦調兵之食方勤必大積於廩困
庶少寬於州縣願馳日馭亟屏龍工開晷晷晷晷晷
輝式蘇萬物發如坻如京之詠爰快三農惟帝降衷

鑒人歸命

祈晴疏

佛以度物為心食乃生民之命比者時陽不固暑雨
既淫大貽南畝之憂將失西成之望仰伸誠祝上扣
法慈惟願放白毫光如一念傾被頑陰於四極鑿麗
日於九霄永賴庇存益堅回向

祈晴疏

秋方登稔平鋪萬畝之雲時適歛收綿作彌旬之雨

墮農功之垂就殞民心於載憂謹瀝丹誠仰投皇覺
願幹回天之力潛施馭日之功函掃妖氛廓開霽色
耕而不穫念茲終歲之勤得之則生保此有年之喜

祈晴疏

積陰作沴潤茲常雨之愆新穀未登懼失有秋之望
敢殫凡懇仰叩覺皇惟溥示於能仁遂廓開於急照
清風四起白日正中農夫既收軍餉元闕吏獲逃於
曠民咸樂於豐年

祈晴疏

秋日淒淒亟偶為霖之害我黍與與莫輸是獲之勤
惟軍食之攸資豈農功之可後仰祈佛慧曲贊天陽
起眉間一毫之光羣陰咸伏來郊外千箱之積百室
用寧法力无邊凡情有賴

謝晴疏

秋霖敗獲仰二諦以興哀佛日當空肅羣陰而退聽
敢罄歸誠之禮用酬從欲之仁風雨攸除已丕承於

法力婦子寧止更卒享於豐年

謝晴疏

李樂靜

佛果難量法門无礙天龍人鬼盡入揔持地水火風
一歸變現託化身于千劫拔苦道於衆生恭惟靈惠
大師位證真乘功深願海自有唐開元之際夙種妙
緣由先帝熙寧已來屢開靈感一方受賜萬目同瞻
比者雨潦因仍河流漲溢蛙鳴新竈十日不收槎擁
成樓四郊如海已危生于朝菌將葬骨于湖魚屢瀝

丹衷累通玄鑒威神所應影響不違幹巨浸以東傾
破重陰於一指天青日白鸛鶴爭飛野闢天平牛羊
可數凡在含生之類共蒙再造之恩是用祇率屬僚
肅陳淨供誓殫真信上報深慈惟願遍福德於未來
廣津梁于不倦使四時調序百穀滋豐少完瘡瘠之
餘永賴生成之賜

謝晴疏

歛藏
在候
縣為霖雨之災齋沐致誠虔以辨香之禱

以爾農之勤苦見我佛之慈悲取墜景於虞泉飛祥
光於若水是刈是穫亟如寇盜之空載笑載言永保
室家之慶深仰無窮之惠空懷莫報之恩

謝晴疏

害菜盛而作靈雨方以為憂披雲霧而覩青天翳誰
之力賴我菩薩現大神通憫此衆生罹茲災障頓息
常陰之罰用成大有之年以惠農工少寬吏責一心
奉請已昭能應之誠稽首皈依難論無窮之報

謝晴疏

近以霖湯為災盛陰積晦消敷素詰叩慈仁果膺
六度之虛尋弭三農之患既垂真蔭爰舉梵儀弭慶
皈依庶申謝答

祈雪疏

李樂靜

佛果妙圓法力平等雖無求而不獲須有感而後通
敢竭精衷上千慈鑒比者冬陰不固時雪既愆幾成
焦旱之災竊慮疾疫之變伏願不違本誓力度有情

俯為三日之期遍蒙一尺之瑞水堅回嚮益勵齋嚴

謝雪疏

一雪應祈初無所報三春謹始預有所蘄爰取時日
之良載選池亭之勝肅嚴供具繼設燈輪彼衆有情
咸至道場之上此光無盡普輝法界之中庶伏妙因
可哀勝果伏願大宋世界汝州管下時人安樂歲豐
穰同發道心各登佛地然後十方國土一切靈祇雖
各有緣等同斯願恭惟三寶印知衆聖歆鑒

聖宗名賢五百家播芳大全文粹卷百二十一終

聖宗名賢五百家播芳大全文粹卷百二十二

疏

祖父忌辰道場疏

黃魯直

昔嘗逮事荷莫報之劬勞今屬諱辰未忘哀於冥漠
式陳淨供少助善緣恭對皇覺表白

祖父忌辰齋僧疏

葛謙白

業鍾黑白各招果報之殊供及緇黃必獲超升之福
仰憑三教追助一靈先公特進伏願頓悟上乘長

棲道蔭法空五蘊謹罷三官聞圓音於玉毫之前受
秘籙于瓊章之上佛土三千畛親禮世雄玉京十二
樓徧遊仙境

祖母忌辰道場疏

朝夕寢門雖不逮事綢繆牖戶燕我後生適當屬續
之辰深動降霜之感敬依梵刹延飯衆僧冀此妙因
儻為冥助

祖母忌辰道場疏

昔嘗逮事早纏風樹之悲尚憶分甘莫致冰魚之養
式逢諱日更切哀誠爰集苾芻之僧躬設伊蒲之饌
冀憑慈力仰助超升伏願不昧本來承茲法施

祖母忌辰道場疏

瓜瓞有初簡在夫人之德風枝不靜實惟先君之恩
爰屬諱辰式追冥福恭惟大覺證知

薦考君設水陸疏

如來觀曠野之神嘗懷悲濟之念慶喜見面然之士

遂開拯技之科三檀之施既泊於廣筵十習之愆必
消於幽趣 先考特進遽辟昭代奄屆小祥痛惟罔
極之恩爰設无遮之會歸依薩婆若廣誦修多羅以
伽陀之會而施苾芻多之倫以蘇摩之燈而燭眩魔
羅之界恩霑有頂法被無邊庶伏薦嚴上資英爽
先考特進伏願得柔順忍具智證通罪垢消除如風
中之沙聚性真明悟若掌上之蕃魔以五根五力之
殊因證三耶三善之妙覺

薦考君懺大藏經疏

如來四十九年慈每興於五濁大藏五千餘卷法備
演於三乘惟炎漢初譯於摩騰洎大唐廣翻於玄奘
道宏震旦教接迦維釐為經律論之文大滅貪嗔癡
之毒魔軍敗北信士指南皎如暗世之燈明濟若巨
川之船棧某纏哀陟岵歸命世雄爰親閱於琅函若
面承於金口願憑妙利式薦尊靈 先考特進伏願
絕邪見之稠林離三有之窟宅蠲除業障報障煩惱

障安住業根信根精進根觀史天中速觀九廊之院
安養國內坐臨七寶之池

皇考朝請忌辰道場疏

黃魯直

二親之年如白駒之馳過隙百身以報如一滴之益
滄溟罔極之恩永思甚痛式當諱日恭設妙因儻承
不二之音咸開頓覺之路仰惟功德證知

薦考君書維摩楞伽金光明觀世音經疏

天乘梵乘欲頓超於法畛筆施墨施可追助於冥塗

而况談盡不盡於毗耶之城說巨不巨於楞迦之嶺
信相演偈於金鼓無盡施法於寶珠皆為法藏之秘
文寶亦如來之了義虔書梵度獲福河沙 先考特
進伏願避六賊之林射四諦之的絕攀緣於驕幢幻
藥期超度於法棧慈航正語正業之道支速能證入
無量無邊之佛土自在超

薦考君道場疏

禮制有盡喪畢三年思慕無窮血霑九地昊天罔極

夫復何言恭聞諸佛示慈悲心行方便路曾開萬字
誓度四生不以禮薄不足以藹馨香不以人微不足
以感高厚憫茲荼毒與作津契儻使滯魂凝魄得乘
威光慧力回向初地不入塵流某也雖不能謝德於
无私亦安敢忘情於不報

薦考君懺寶積經疏

迦文千百億身雖玉毫之莫覩寶積四十九會皆金
口之所宣爰歸命於竺墳肆親披於苔藓冥資法力

亟拯幽塗 先考待制伏願斷有漏緣破無明闇滅
障如風中沙聚見性如掌上菴摩覩如來微笑之光
滅多生習氣之重為尊為上為妙永依三耶菩提作
舍作救作歸即詣一生補處

薦考君大祥道場疏

邵公濟

元身已歿悵奄及於祥除令名益新既再蒙於褒贈
永念怙恃之德不酬覆載之恩惟茲勝峰近臨大墓
祥光所燭吉地可通躬即仁祠夙修淨供近痛无父

之國舊悲見母之泉念孤苦之餘生宜委頓之末路
未先犬馬空難鳳麟追思先君子之平生當憑大菩
薩之至鑒庶冥福之可薦竭危懇之甚哀

薦考君飯僧疏

人生易失俄經六七之光陰佛慧難窮願照三千之
世界庶令英鬼徑達上方恭惟先考通直才富班
楊學追孔孟蚤飛鸚表即馳譽於儒林晚奮鵬圖遂
升華於仕版潔已以進直道而行不為矯拂以沽名

獨秉公忠而報國一司邑尉宿姦皆逾境而去之四
領縣章遠民有負子而至者治聲籍甚士論藹然俄
均逸於嵩山姑養高於淮甸放懷詩酒方懷蓮社之
清遊脫屣忘骸忽起蓬山之歸興念壽考本無足恨
願追慕獨不能堪用傾欲報之情仰薦無生之福某
恩深鍾愛義急傳家處帝學者兩年妄希曾子之三
釜距親闈者千里久稽何蕃之一歸既辜晨昏視膳
之心更廢疾病嘗藥之禮竟作終天之別徒增叩地

之悲幸如來是真皈依使過去得大饒益雖善人何
必多懺而哀懇由茲少伸休願 先考通直乘此妙
緣悟諸无相蓮花不着水長解脫於九幽明鏡亦非
臺自圓成於一性斯謂不亡之壽式寬罔極之思

皇考忌辰水陸疏

三塗苦海由一念以沉淪千聖覺航極羣迷而濟度
蓋死生之大變隨罪福之所招故孝子慈孫捐百身
而莫贖非利根上智墮衆惡以何知惟我先人早探

真諦高明不亂琅然易筭之言寡慾无邪允矣齋心
之力光陰迅駛諱日存臨願孺慕之如新痛仙遊之
愈遠爰修淨供普薦含靈自九土之波翻積十年之
雲擾或被堅執銳筋力疲於封陞或斬將奪旂骨肉
膏於原野孤忠莫白幽魄誰依矧荒歎之相仍致流
離之莫保赤子弃置於道路豈無惻隱之仁白首枕
藉於溝渠寧有盖藏之望願依秘印來赴梵筵澡沐
壞軀歸投正法從無始之多劫息饑火之貪癡悟有

生之皆空廓寬心於平等速資懺拔永斷攀緣仗先
君為導師亟趨梵率與諸人為友同證菩提雖所求
者奢而所持之至狹將所格者廣寔所持之至誠集
此無邊之妙酬罔極之隆施仰祈大覺俯賜證明

先妣忌辰道場疏

黃魯直

天地罔極初無報德之階日月不來每深濡露之感
屬當諱日更切哀摧爰以佛香普薰僧飯維九冥寂
寞而積善之慶在心推諸佛慈哀則正覺之門有路

伏惟萬德俯賜證知

薦母設齋道場疏

拔邪歸正回苦作甘援汨沒於濁流變清涼於惱地
是諸佛之洪願也鑄膚戴德擢髮數恩感天棘之甚
勞嘆蓼莪之罔報是人子之哀情也職居中饋業墮
浮生况茲有漏之軀動是無明之境則母親生之日
也求免愆尤肅羞蘋薦欲求懺悔祇啓具文資十善
之津梁破三塗之苦惱則母親今之死也以諸佛之

洪誓憫人子之哀情知生日之愆尤知死後之懺悔
歷陳血懇仰瀆鑒知

請佛心和尚為亡妣說法疏

孤子某今日襄事啟靈石山佛心大和尚升法座為
亡妣說一句偈言使幽明有知得親覩佛面承佛音
旨是某所以為人子者報答親生之萬一也

中元薦考妣道場疏

毛伯穎

生我劬勞罔極之恩曷報惟天陰隲予善之理弗渝

故我佛以入俗利生之慈垂奉先追遠之教當衆生
休夏之日實禮典嘗秋之時霜露既濡慨增永慕蘋
蘩可薦昭事如存以真常微妙之文濟解脫超升之
路恪遵梵典恭設齋祠上以莊嚴諸聖於十方下以
津濟含生於六道庶憑願力追遠先靈伏冀內外宗
親祖禰昭穆受生樂國咸知先佛之言餘慶流宗永
錫後昆之祉

薦母設羅漢齋疏

李去病

不忘付囑有大因緣廓六通之神悉知悉見出三昧
之定來赴來臨為我母之導師登諸佛之補處下覃
眷屬咸契願心

孟蘭盆薦考妣疏

葛謙白

日月其徂永動劬勞之感霜露既降難忘悽愴之心
輒緣自恣之辰虔啟解懸之會以酥醎之味而供十
方調御以伊蒲之饌而延五戒桑門禮化佛之懺儀
誦雨花之秘呪香普薰於三畝燈廣照於九幽叢此

妙因用薦冥福伏願悟無生之忍盡有漏之緣百生
千生乃至億生咸滌性遮之障一地二地乃至十地
漸趨正覺之門

孟蘭盆薦考妣疏

開除禁制實為大歡喜之辰升濟神明必伏解倒懸
之會輒伸誠悃仰扣覺慈伏念某罪賦孤惇早失悟
恃低徊仕路每興三釜之悲拯拔幽塗尤念一乘之
薦特捐蒲供虔奉金容飯鷲嶺之高深演魚山之雅

頃哀茲福利上薦尊靈伏願摧煩惱之山裂愛慾之網心疑頓釋若解百疊之花巾罪垢全消如散八風之沙聚早生淨土永脫塵緣

孟蘭盆薦考妣疏

孟蘭建會為一衆自恣之辰貝葉垂科實二尊追福之日輒憑梵侶仰扣覺慈伏願依尊上乘悟無生忍業障報障煩惱障罔不蠲除信根定根精進根普皆證入受生補處得大揔持誦蓼莪之章勞瘁敢忘於

親念啓孟蘭之會薦嚴恭伏於佛乘躬即寶祠用伸丹悃伏願領後三義悟不二門薩婆若海中備聞法要波羅密字內親覩佛光

薦考君懺華嚴經疏

葛謙白

香水海中塵塵盡為佛土摩竭國內句句皆演真乘能依菩薩之園林坐覩華嚴之境畧光考待制伏願被精進之甲冑拔生死之淤泥五根五力五覺支十行十住十迴向普皆證入頓致圓明悟毗盧之法

身不待寶金蓮綻受彌勒之祕記何須樓閣門開

薦考君看四大部經疏

竺乾遺教備演三乘寶藏論文獨先四部爰肅迎於
梵侶俾持誦於真詮恭啟法筵別施僧次設桑門蒲
塞之饌焚此岸旃檀之香綜此殊休虔祈冥福先
考待制伏願聞第一義入不二門性業遮業則无不
消融理障事障則悉皆開悟由寶積之路早登涅槃
之山乘般若之船坐入華嚴之界

薦考君懺涅槃經疏

娑婆雙樹迦文顯示於泥洹尸大城師刹親承於付
囑雖金剛之身豈虧於堅固然玉毫之相稍闕於光
明宜憑最後之談用作將來之眼先考待制伏願
會无為之舍斷有漏之緣苦諦集滅道諦則无不證
知常想我樂靜思則普皆證入百俱脔劫常現无邊
之身一刹那門超生不動之國

薦先妣忌辰親誦維摩楞伽金光明楞嚴圓

覺法華經疏

稱性宣揚義存貝葉悼先持誦福過河沙而况毗耶
談不二之門楞伽演百八之句百劫衆惡懺悔入金
鼓之聲一解六亡縮疊契華巾之喻銷幻翳而顯本
性之不動滅化城而知二乘之非真是皆法藏之秘
文寔亦如來之了義度宣梵度用薦冥塗 先妣魏
國夫人伏願絕邪見之稠林離三有之窟宅安養國
內坐臨七寶之池覩史天中速到九廊之院

追薦考妣道場疏

李去病

父嚴遽弃愴已改於新年母慈大違痛又臨於諱日
深念怙恃之德實均覆載之恩顧不孝不肖之餘生
負未死未報之重責雖知己隔於幽顯尚求升躋乎
神明恭揚貝葉之文妙誦伊蒲之供伏願先考修撰
先妣真寧碩人初心不昧宿垢盡空直見佛於祇園
不游魂於岱岳再念某近臨大墓肇起新祠稍治林
泉粗興土木不知忌諱或犯威嚴雖妄作之過難逃

而追遠之心可憫欲陰譴之獲免賴聖力以無邊柏
茂松深天長地久靜寐已安於邱壟高名永播於古
今盡瀝哀誠仰憑至鑒

薦亡妻淑人水陸疏

孫仲益

伏以常住真心一塵不立妙莊嚴海五濁皆空是故
諸佛開衆生方便之門自然一念證無上菩提之路
伏念某亡妻淑人章氏十年好合憂患乖離萬里來
歸死生契濶屬臨諱日祇叩真乘宏宣多貝葉之文

瞻禮青蓮花之座龍天釋梵水陸空行戲游神通恭
敬圍繞伏願淑人章氏厭離火宅超悟三乘綰疊華
巾解除六結後身了了畫沙之智已成曠劫冥冥觀
河之見不昧

薦妻懺親誦華嚴華經疏

葛謙白

依輪圍十萬億刹實顯性宗訪知識一百十城俱談
真諦欲追影福爰效薰持亡妻安人樊氏伏願壞無
明鈎破睡眠甲視幻境如熱時之燄消業障如風中

之沙莊嚴閣前彈指親聞於彌勒蘇摩國內按頂常
遇於文殊

介休縣君忌辰道場疏二首 黃魯直

穠如桃李鞠為松栢之陰澗有蘋蘩莫助豆籩之薦
歲將二紀哀念如新式以諱辰敬修冥福顧平生之
競爽雖絕域而感通 江山阻長歲月徂謝冢上之
木已拱室中之言未寒屬當撤瑟之辰深念采蘋之
助恭修佛供用薦冥途稽首覺皇俯垂哀救

薦兄道場疏

入手功名凜凜平生之壯志回頭夢幻悠悠去國之
孤魂行闕秋風忽辭塵土故鄉明月空撫松楸一旦
生違百年死別念骨肉之恩莫報惟津梁之力可憑
爰竭丹棕仰皈皇覺夜臺寂寂幽明已隔於七旬法
界恢恢煩惱頓超於六道

嗣功十八弟推官舉哀疏 黃魯直

禮服之哀雖名初從兄弟之義不異同生孤苦相依

夷險一概來問投荒之客書墨未乾追尋細席之言
德音猶在不謂禍成山岳痛割肺肝然以宿植善根
已成道種式延淨土少助勝因陳法供於祇園演金
文於貝葉伏願嗣功十八弟推官最初一念不昧本
來隨緣世願還為骨月歸依大覺為作證明

薦男請長老陞座疏

鄧志宏

幻體反空已失倚門之望潮音振地寧湏建鼓之求
蓋禪悅之門不殊今古故游戲之際可度人天惟亡

男歐寧令尹紹業箕裘律身冰雪雖苦學志於附鳳
而涉世終於割雞陶令徑歸雅有林泉之趣子文无
愠何妨萋菲之讒氣方凜於長虹身忽先於朝露欲
追九泉之福可无一滴之禪而等慈有大比丘土面
灰頭初不落於兔角拈花豎拂亦何與於殂毛盡吸
西江均為法雨生吞粟棘高視叢林願假妙音喚迴
英魄已脫南閻之苦便躋兜率之遊

薦女水陸疏

孫仲益

伏以死生之分定應同露電之觀父子之情鍾尚懷
駒犢之愛仰憑十力俯薦一哀伏念某亡女小師自
天降凶遭世罔極父罹大謗罪遷于嶺表母懼不測
憂死于蓐中以莞莞童孺八歲之餘而呱呱號慕三
年之久孤危極矣何恃而存疾病乘之遂隕其命念
私門之降戾致穉女之蒙辜歲行一周生還萬里不
免水火永負九原沈痛之寃示見神通獨伏諸佛慈
哀之救是用集桑門之勝侶演祕藏之真乘洞然無
藏之燈彌蒲衆香之鉢海潮殷地花雨翳空升濟幽
明歸依佛祖伏願亡女洗心償一念之債彈指斷三
生之緣降伏衆魔滅除諸障觀一切有為之法悟四
大無常之身普同有情俱證無漏

薦李氏女水陸疏

伏以衆生造十習因受無量苦諸佛證三摩地示大
悲心一指彈而沙界已周五體投而應身出現仰伸
弘願俯罄一哀伏念某人六妄所纏十生相續屬免

身之彌月忽遇疾而暴亡四大無常百藥靡救恍如
一夢已隔九泉念茲齧骨之初莫救投車之痛是用
歸依寶王刹稽首大法輪發意圓成佇佛求應千燈
普現八鏡交光五色摩尼照濁水之源百寶蓮花雨
婆娑之界伏願悟三生之宿障洗曠劫之塵勞破煩
惱濁為解脫門斷生死根為菩提種滅諸國土障見
自在天身如來會中作法王子三千世畧十二類生
同躋極樂之方共獲逍遙之果

舅母十三太君舉哀疏

黃魯直

從學外家早蒙慈誨竄身裔土孤奉至恩拜書墨之
未乾忽訃音之來及瞻雲萬里空盡於一哀報德九
冥恭投於三寶伏惟大覺證明

薦秦國夫人道場疏二首

歐陽永叔

淑懿之賢已賁追榮之典蔭幽之助仍資衆善之因
爰即華林載陳法供冀慈仁之遠被均勝利於無窮
乘此妙緣超升福果 覺慈廣被兼濟於含生冥福

所資必憑於慧力惟懿柔之秉德享壽考而有終隆
睿眷以不忘集勝緣而增備願乘妙道超薦真乘

追薦請長老升堂疏

開闢已降惟佛獨尊供養之中以法為勝莊嚴此坐
祈為讚揚行解如師方堪舉唱潮音一吐沙界咸聞
儻神識之有知庶輪回之不滯

追薦請長老升座疏

金甌浮雪玉篆團雲麩密奉珍蘋蘩薦德以種種供

養某所能也進禪說羞具法喜膳香浮乳酪味過醎
醐以般若供養某所不能也蓋聞某師宗通說通我
利人利以三昧口舌作六道津梁聲動人天恩滋存
歿

追薦講圓覺經疏

邵公濟

四大分離誰為和合三世平等本無去來伏冀滅空
翳花了幻垢相依清淨願力了增上妙心永斷輪回
徃大圓覺已向眼光落時薦取豈待葛藤髻頭方知

普使一切衆生同證不壞法性

追薦設八菩薩道場疏

韓子蒼

有終有始雖古今萎化之常惟孝惟慈乃子母無窮之義况追感之無地而永別以終天表哀痛心必皈依佛是用兩夕薰修之勝會修八菩薩之道場伏願彌勒指南普賢灌頂地藏處堅固地觀音發微妙音生生妙吉祥念念除業障虛空藏破開業力金剛手遮護凡情乘此大緣永歸妙果衍子孫之順孝保門

戶以亨昌凡厥有情同霑勝利

追薦道場疏

汪彥章

伏以即水成漚起滅孰為自性將花覓果因緣悉是無明蓋圓通一了則觸境皆真取執二途則無方不得况履六塵之搖奪妄隨四大以拘纏現前而互別羣機究竟而本無一物出沒死生之苦海生成煩惱之癡根月以指標詎可指端而認月跡云空有云何跡內以忘空若非法力之宣揚誰識心源之解脫是

佛慈悲之勝力隨人方便以開權伏念某人慧性夙
明真詮冥契昔時鷲嶺同為聽法之人今日龍宮偶
墮非男之數自返涅槃之趣俄興窀穸之哀雖多生
分段之何常然善眷攀緣之罔極是用前瞻瑞相恭
啓琅函承微笑而演圓音說大乘而專滿字願託人
天之調御長陪帝釋之遨遊於彈指頃而超過十方
於刹那間而普知三世維摩室內頓憑燈相以回心
舍利緣中速轉女身而證道

追薦東坡先生疏

李方叔

端明尚書德尊一代名滿五朝道大不容才高為累
惟行能之蓋世致忌媚之為仇久蹭蹬於禁林不遇
故去遂飄零於瘴海卒老于行方幸賜環忽聞亡鑑
識與不識罔不盡傷聞所未聞吾將安倣皇天后土
知一生忠義之心名山大川還千古英靈之氣繫斯
文之興廢占吾道之盛衰茲乃公議之共憂非同門
人之私義所恨一違師席九易歲華意徒生還遂為

死別慕子貢築場之意每罄哀誠誦普賢行願之文
庶資冥福阿僧祇劫為轉法輪兜率陀天頓居福地
仰祈諸聖俯鑒微情

追薦秦太師齋僧疏

濟世出世圓機蓋本全提捨生受生游戲不妨自在
要知無上妙用當屬沒量大人恭惟太師申王愍
海懸百戰之難起石室三昧之定出赤子於兵火置
之清涼立皇基於金湯屹然鞏固既畢濟於悲願乃

復歸於淨方彼時此時初無差別前佛後佛皆我導
師尚不忘於津梁俾悉趨於覺路

追薦曾丞相疏

毛伯穎

人之云亡時既傷於殄瘁士為知己義不負於幽明
故相黃公披禍亂以立朝廷薦賢才而報人主功虧
一篲恨徒積於重泉難贖百身墳已荒於宿草山川
悠遠歲月眇徂永懷夙昔之音容誰主春秋之祭祀
邱墟東閣空嘆彈鋏之聲慟哭西州莫致生芻之奠

屬此中元之日聊申下客之情憑仗佛乘資薦冥路
伏願聰明徇達之性不昧本來清淨莊嚴之鄉早登
解脫法界海惠猶如虛空世世生生相為善友

追薦席大資疏

高山仰止方勤模範之依梁柱摧乎忽報光靈之殞
歎斯文之將墜悼知己之難逢江海脩塗訃音遠至
衣冠清議悲憤同聲天道難堪百身何贖撫棺一慟
奔馳難造於几筵築室三年封植未知於坵壠興言

及此墮淚何勝惟憑西竺之淨緣仰薦東維之逝魄
歿故參政大資相公伏願本來道學不時死生夢寐
可占猶識衛公之爽爽山丘所歷還同謝傅之生存
證羶真乘超登覺路一彈指顧徧慈氏樓閣之遊正
法眼中入普賢行願之海

追薦秦少游疏

東坡

生前莫逆蓋緣氣合而類同死獨未忘將見情鍾而
禮具伏為歿故少游秦君學士早雖穎茂觸事遭迍

晚向仕途方需祿養未厭北堂之歡樂遽逢南海之
播遷頓足牽衣哭妻孥於道在含酸吐苦顧鄉國於
淮壖首尾八年憂驚態同時逐客膺大需而盡復中
原唯子莫年厄終窮而歿于瘴域林泉夜夢猶疑杖
履之並遊風月扁舟尚想江湖之共泛追傷何補焚
誦乃庶仗真詮掃除百遲夙障而况真源了了素已
悟於本心淨目昭昭无復加於妄翳便可神遊淨土
岼到菩提永依諸上善人常住無所還地

追薦馮大學疏

李去病

伏以鄉閭晚輩每望先生之後塵詩禮衰門豈有孺
子之可教辱知愛愈久愈新念臭味之偶同譬諸草
木而蹤跡之相避動如參商夢寐常勤於寸心寒温
久廢於尺紙以一介湮沉之舊當衆人趨附之初媿
無因以得前安所恃而自弃三薰三沐方圖晚節之
歸一死一生已抱窮天之恨式陳淨供仰薦冥游既
宿植於善根想益堅於願力諸妙樓閣早伺彌勒之

登九品蓮花永受慈尊之記

追薦邵先生疏

毛伯穎

築室三年悼光靈之浸遠生芻一束慨精爽之如存
敢課祕言少資冥路某官文章爾雅德義可尊沉鳧
浮鳧當作山川之綱紀格言善行蔚為老成之典型
壽考歸全哀榮無憾願垂歆答早遂超升垂裕後昆
克保常平之繼世鑒臨知舊永為孔李之通家

追薦知命百日疏

黃魯直

脊鴿在原汝有急難之義虎兕出柙我無保惠之功
書墨未乾訃音來即水火不免將何面見先親股肱
或虧念誰依而終晚歲逮此卒哭幾欲無生躬掃祕
園親供緇侶冀憑大覺之力少慰九冥之思稽首慈
尊惟垂悲救

聖宋名賢五百家播芳大全文粹卷一百二十二終



